

四庫全書

經部

欽定四庫全書

經部
春秋輯傳卷十一

詳校官監察御史臣劉芬

總校官編修臣王燕緒

校對官中書臣李元春

謄錄監生臣甯樸

欽定四庫全書

春秋輯傳卷十一

明 王樵 輯

昭公二

十有五年春王正月吳子夷末卒

公作夷昧

二月癸酉有事于武宮籥入叔弓卒去樂卒事

左傳春將禘于武宮戒百官梓慎曰禘之日其有咎乎吾見赤黑之禋非祭祥也喪氛也

禋妖氛也蓋見于宗廟故以為

非祭祥也
氛惡氣也

其在泣事乎二月癸酉禘叔弓泣事籥入

而卒去樂卒事禮也公羊傳其言去樂卒事何禮

也君有事於廟聞大夫之喪去樂卒事大夫聞君之

喪攝主而往

臣聞君喪義不可以不即行故使兄弟若宗人攝行主事而往不廢祭者古有

分土無分民大夫不世已父未必為今君臣

大夫聞大夫之喪尸事畢而

往

賓尸事畢而往大夫祭謂之賓尸

穀梁傳君在祭樂之中聞大

夫之喪則去樂卒事禮也君在祭樂之中大夫有變

以聞可乎大夫國體也古之人重死君命無所不通

杜氏曰畧書有事為叔弓卒起也武宮魯武公廟
成六年復立之 孔氏曰祭必有樂樂有文舞武舞
文執羽籥武執干戚其入廟也必先文而後武當籥
始入叔弓暴卒故去樂不用而卒祭事也叔弓之卒
當籥入之時故舉籥入也及其去之則諸樂皆去故
云去樂非獨去籥舞也祭禮鼎俎既陳籩豆既設然
後樂舞始入緣先祖之心以大臣之卒必聞樂不樂
又孝子之心不忍徹已設之饌故去樂卒事 按曾

子問當祭而聞天子崩后之喪君薨夫人之喪皆廢而未及大臣檀弓記衛大史柳莊寢疾君曰疾革雖當祭必告是知舊不告也不告禮也衛當祭而告神明已接而禮不終乃以請于尸而往示全于祖魯襄仲之喪卒事而聞而不知廢繹乃以萬入去籥示全於臣是皆失之今年有事於宗廟叔弓蒞事籥入而卒去樂卒事得禮之變矣緣先祖之心以大臣之卒必聞樂不樂緣孝子之心禮儀既行神明已交不可

以卑廢尊故去樂卒事而可也

若叔弓歿於家則不可告公穀之說非也

宗廟合禮者常事不書此記禮之變而書之者也

左氏

妄以禘為四時之祭故云禘於武宮說見吉禘于莊公

夏蔡朝吳出奔鄭

朝公作昭無出字

左傳楚費無極害朝吳之在蔡也欲去之乃謂之曰

王唯信子故處子於蔡子亦長矣而在下位辱必求

之吾助子請又謂其上之人曰王唯信吳故處諸蔡

二三子莫之如也而在其上不亦難乎弗圖必及於

難夏蔡人逐朝吳朝吳出奔鄭王怒曰余唯信吳故

寘諸蔡且微吳吾不及此女何故去之無極對曰臣

豈不欲吳

非不欲
善吳

然而前知其為人之異也

言其多
權謀

吳在蔡蔡必速飛

以鳥
喻

去吳所以翦其翼也 杜氏

曰朝吳故蔡大夫公孫聲子歸生之子言吳在蔡必

能使蔡速強而背楚

胡傳朝吳蔡之忠臣雖不能

存蔡而能復蔡其從於棄疾者謂蔡滅而棄疾必能

封之也棄疾以其忠於舊君而信之使居舊國可謂知

所信矣則曷為出奔費無極害其寵也無極楚之
讒人去朝吳出蔡侯朱喪太子建殺連尹奢屏王耳
目使不聰明卒使吳師入郢辱及宗廟讒人為亂可
不畏乎為國有九經而尊賢為上勸賢有四事而去
讒為首志朝吳出奔而入郢之亂機兆矣然朝吳身
居舊國處危疑之地若能以忠信自達有功不居深
避寵利而早杜讒嫉之謀則善矣費無極乃語之曰
子亦長矣而在下位辱也吾助子請是以寵利窺之

而莫能先覺故特書其出奔示人居危疑之地立讒
妬之所道不可不前定為後戒也 按朝吳忠於蔡
亦有功於平王費無極害之者害其寵也朝吳安於
下位似非貪于寵利者惜乎復蔡之後不早自謀焉
推朝吳之心內不忍遠於舊君外不敢自踈於楚王
此兩難也則勿居其位可也張子房韓讐已報不賴
漢寵翩然物外得其道矣朝吳有功兩國見信兩主
而身兩事焉此費無極所以來位下之言在其上者

所以生及難之慮楚王所以信速飛之謗而不復詰也費無極固巧於讒然在君子不可不精於自處也
六月丁巳朔日有食之

晉荀吳帥師伐鮮虞

左傳晉荀吳帥師伐鮮虞圍鼓

鼓白狄之別鉅鹿
下曲陽縣有鼓聚鼓

人請以城叛穆子弗許左右曰師徒不勤而可以獲城何故不為穆子曰或以吾城叛吾所深惡也吾不可以欲城而邇姦使鼓人殺叛人而繕守備圍鼓三

月鼓人請降使其民見曰猶有食色姑脩而城鼓人
告食竭力盡而後取之以鼓子戴鞮歸 陳氏曰嘗
狄晉矣則荀吳何以無貶於其重焉貶餘實錄而已
冬公如晉

左傳平丘之會故也

十有六年春

左傳春王正月公在晉晉人止公不書諱之也

猶以取鄭

故

齊侯伐徐

左傳齊侯伐徐二月丙申齊師至於蒲隧

徐地

徐人行

成徐子及邾人莒人會齊侯盟於蒲隧賂以甲父之

鼎

甲父古國名

楚子誘戎蠻子殺之

公作戎曼

公羊傳楚子何以不名夷狄相誘若不疾乃疾之也

楚大蠻小皆以子稱杜言河南新城縣有蠻城則

是內地之戎在楚北也戎是種號蠻是國名子爵也

夏公至自晉

秋八月己亥晉侯夷卒

九月大雩

季孫意如如晉冬十月塋晉昭公

十有七年春小邾子來朝

夏六月甲戌朔日有食之

左傳祝史請所用幣昭子曰日有食之天子不舉

不舉

盛伐鼓於社

責羣陰

諸侯用幣於社

請上公

伐鼓於朝

退自

責禮也平子禦之曰止也唯正月朔慝未作日有食

之於是乎有伐鼓用幣禮也其餘則否太史曰在此

月也

平子不識正月正月謂建巳正陽之月也於周為六月于夏為四月慝陰氣也四月純陽用事

陰氣未動而侵陽災重故有伐鼓用幣之禮也平子以為六月非正月故太史荅言在此月也正陽之

月者十一月建子為陽始此後每月一陽息一陰消至四月建巳六陰消盡六陽並盛是為純乾之卦正

陽之月也五月建午為陰始此後每月一陰息一陽消至十月建亥六陽消盡六陰並盛是為純坤之卦

正陰之月也

日過分而未至

過春分而未夏至

三辰

日月星

有災

日月

相侵又犯是宿故三辰皆為災

於是乎百官降物

素服

君不舉辟移時

辟正寢過日食時

樂奏鼓祝用幣

社於

史用辭

責自

故夏書曰辰

不集於房

日月不安其舍

瞽奏鼓嗇夫馳庶人走此月朔之

謂也當夏四月是謂孟夏平子弗從昭子退曰夫子

將有異志不君君矣

日食陰侵陽臣侵君之象故平子不肯救日食昭子知其無君

也

秋郊子來朝

左傳郊子來朝公與之宴昭子問焉曰少皞氏鳥名

官何故也

少皞金天氏黃帝之子已姓之祖

郊子曰吾祖也我知之

昔者黃帝氏以雲紀故為雲師而雲名

黃帝軒轅氏姬姓之祖也

受命有雲瑞故以雲紀事百官師長皆以雲為名號縉雲氏蓋其一官也

炎帝氏以火紀

故為火師而火名

炎帝神農氏姜姓之祖也亦有火瑞以火紀事名百官

共工

氏以水紀故為水師而水名

共工以諸侯霸有九州者在神農前太皞後

太皞氏以龍紀故為龍師而龍名

太皞伏羲氏風姓之祖也

我高

祖少皞摯之立也鳳鳥適至故為鳥師而鳥名鳳鳥

氏歷正也

鳳鳥知天時故以名歷正之官

玄鳥氏司分者也

玄鳥燕也春分

來秋分去伯趙氏司至者也

伯趙伯勞也以夏至鳴冬至止

青鳥氏司啟

者也

青鳥倉庚也。立春鳴，立夏至。

丹鳥氏司閉者也

丹鳥，鷩雉也。以立秋來，立

冬去，入大水為蜃。上四鳥皆歷正之屬官。

祝鳩氏司徒也

祝鳩，鷯鷯也。鷯，孝故為司徒。

主教 鵙鳩氏司馬也

鵙鳩，王鳩也。鷩而有別，故為司馬。主法制。

鵙鳩氏司

空也

鵙鳩，鷯鷯也。鵙，鳩平。均，故為司空。平水土。

爽鳩氏司寇也

爽鳩，鷹也。鷩，故為司

寇主 鵙鳩氏司事也

鵙鳩，鷯鷯也。春來盜賊。

五鵙鳩民者

也

鵙聚也。治民上聚，故以鵙為名。

五雉為五工正

五雉，雉有五種。西方曰鵙，雉東方曰

鷩雉。南方曰翟，雉北方曰翬，雉伊洛之南曰翬，雉

利器用正度量，夷民者也

九扈為九農正

扈有九種也。春，扈鵙鷯，夏，扈鷩，秋，扈鷩，冬，扈鷩，黃，棘，扈鷩，丹，行，扈，喈。

昔宵扈嘖嘖桑扈竊脂老扈鷄鷄以九扈為九農之
號各隨其宜以教民事竊即古之淺字竊玄淺黑也
竊藍淺青也竊黃淺黃也
竊丹淺赤也竊脂淺白也
扈民無淫者也
自顓

頊以來不能紀遠乃紀於近為民師而命以民事則

不能故也

按上古朴略故因瑞紀事名官取大意而巳中古文明漸開故因事正名命以民事

如唐虞之四岳九官十二牧成周之六官乃萬世不易之道非不能紀遠而紀近也仲尼聞之

見於郊子而學之既而告人曰吾聞之天子失官學

在四夷猶信

失官官不脩其職也

八月晉荀吳帥師滅陸渾之戎

公作賁渾戎殺無之字

左傳晉侯使屠蒯如周請有事於雒

雒水

與三塗

山名在陸

渾南

萇弘謂劉子曰客容猛非祭也其伐戎乎陸渾氏

甚睦於楚必是故也君其備之乃警戎備九月丁卯

晉荀吳帥師涉自棘津使祭史先用牲於雒陸渾人

弗知師從之庚午遂滅陸渾數之以其貳於楚也陸

渾子奔楚其衆奔甘鹿

周也

周大獲

按先王居允姓

之姦於瓜州自晉惠公誘以來偏諸姬入郊甸世為

周惠后稷封殖天下而戎制之晉之咎也使因王命

驅而逐之庶乎可贖前咎矣今非為王室除患乃因其貳楚而陰襲之使非襄弘先見戎備素警則為王室之震驚也大矣書晉荀吳帥師滅陸渾之戎罪之也無王命動大衆掩戎狄之不備不顧郊甸之震驚言滅則是利而取之非攘之也凡此數者皆不待貶絕而見矣或者猶謂此役異於闢土服遠而得無貶者失之矣

冬有星孛于大辰

左傳有星孛於大辰西及漢

夏之八月辰星見在天漢西今孛星出辰西光

芒東及天漢

申須

魯大夫

曰彗所以除舊布新也天事恒象

天道恒以象類告人

今除於火火出必布焉諸侯其有火災乎

今火向伏故知當須火出乃布散為災

梓慎曰往年吾見之是其徵也

徵始有形象而微也

火出而見

前年火出時

今茲火出而章必火入

而伏行也

其居火也久矣

歷二年

其與不然乎

言必不然也

火

出於夏為三月

謂昏見

於商為四月於周為五月夏數

得天

得天正

若火作其四國當之在宋衛陳鄭乎宋大

辰之虛也

大辰大火
宋分野

陳太皞之虛也

太皞居陳大
火所自出鄭

祝融之虛也

祝融高辛氏
之火正居鄭

皆火房

舍也

也星孛天漢漢

水祥也衛顓頊之虛也故為帝丘

衛今濮陽縣昔
帝顓頊居之

其

星為大水

衛居營室
營室水也

水火之牡也其以丙子若壬午

作乎水火所以合也

丙午火壬子水水火合而相
薄水少而火多故水不勝火若

火入而伏必以壬午

尚未知今孛星當復隨
火星俱伏不故言若

不過其

見之月

火見周
之五月

鄭裨竈言於子產曰宋衛陳鄭將同

日火若我用瓘

珪也

瓘玉瓚

勺也

鄭必不火子產弗與

杜氏曰大辰房心尾也 孔氏曰大火蒼龍宿心

在中最明故時侯主焉 以候四時故曰辰 胡傳

大辰心也心為明堂天子之象其前星太子後星庶
子孛星加心象天子適庶將分爭也後景王崩王室
亂劉子單子立王猛尹氏召伯立子朝歷數載而後
定至哀十三年有星孛於東方不言宿名者不加宿
也當是時吳人僭亂憑陵上國日敝於兵暴骨如莽
其戾氣所感固將墮吳而降之罰也故氛祲所指在

於東方假手越人吳國遂滅天之示人顯矣史之有
占明矣

楚人及吳戰于長岸

左傳吳伐楚陽句

穆王曾孫
今尹子瑕

為令尹卜戰不吉司馬

子魚

公子
魴

曰我得上流何故不吉且楚故司馬令龜

我請改卜令曰魴也以其屬死之楚師繼之尚大克

之吉

得吉
兆

戰於長岸子魚先死楚師繼之大敗吳師

獲其乘舟餘皇

舟名

吳公子光曰喪先王之乘舟請取

之以救死衆許之使三人潛伏於舟側曰我呼餘皇

則對師吳師夜從之三呼皆迭對楚師亂吳人大敗之

取餘皇以歸 杜氏曰吳楚兩敗莫肯告負故但書

戰長岸楚地 胡傳言戰不言敗勝負敵也

十有八年春王三月曹伯須卒

夏五月壬午宋衛陳鄭災

左傳夏五月火始昏見火心星丙子風梓慎曰是謂融

風火之始也東止曰融風融風木也七日其火作乎

木火之母故曰火之始

從丙子至壬午七日
壬午水火合之日

戊寅風甚壬午大甚宋衛陳鄭

皆火裨竈曰不用吾言鄭又將火鄭人請用之子產不
可曰天道遠人道邇非所及也遂不與亦不復火

火作子產辭晉公子公孫於東門

新來未入

使司寇出新

客

新來聘者

禁舊客勿出於宮

為其知國情

使子寬子上

二子鄭大

夫

巡羣屏攝

屏攝祭祀之位

至於大宮

鄭祖廟巡行不使火及之

使公孫

登徙大龜

登開卜大夫

使祝史徙主祔於周廟告於先君

祔廟主石函周廟厲王廟也有
火災故合羣主于祖廟易救護

使府人庫人各餼具

事商成公

鄭大夫

徹司宮

司宮巷伯寺人之官

出舊宮人

先公宮女

寘

諸火所不及司馬司寇列居火道

備非常也

行火所燬城

下之人伍列登城明日使野司寇

縣士

各保其徵

謂所役之

人

郊人助祝史除於國圻

為祭處于國圻者就太陰禳火

禳火於左

冥

水神

回祿

火神

祈於四廊

廊城也城積土陰氣所聚故祈祭之以禳火之餘災

書

焚室而寬其征與之材三日哭國不市使行人告於

諸侯宋衛皆如是陳不救火許不弔災君子是以知

陳許之先亡也

胡傳禪竈所言蓋以象推非妄也

而鄭不復火者子產當國方有令政此以德消變之
驗矣是知吉凶禍福固有可移之理古人所以必先
人事而後言命也

六月邾人入郕

音禹

左傳郕人藉稻

周之六月夏之四月種稻之時其君自出履行之藉履也

邾人襲

郕遂入之盡俘以歸郕子曰余無歸矣從帑於邾邾

莊公反郕夫人而舍其女杜氏曰郕今瑯邪開陽

縣妘姓國

秋莖曹平公

冬許遷于白羽

左傳楚左尹王子勝言於楚子曰許於鄭仇敵也而居楚地以不禮於鄭晉鄭方睦鄭若伐許而晉助之楚喪地矣冬楚子使王子勝遷許於析實白羽杜氏曰自葉遷也畏鄭而樂遷故以自遷為文十五年平王復遷邑許自夷還居葉孔氏曰十三年楚師滅蔡靈王遷許胡沈道房申於荆則許從夷向荆也

平王復之當從荆向夷自夷又請遷近楚楚以葉與之葉在楚界故為居楚地

十有九年春

附左傳楚子之在蔡也鄖陽封人之女奔之生太子

建及即位使伍奢

舉之子

為之師費無極為少師無寵

欲譖諸王曰建可室矣王為之聘於秦無極與逆勸

王取之正月楚夫人羸氏至自秦

王自取之故稱夫人

宋公伐邾

左傳鄆夫人宋向戌之女也故向寧請師

寧向戌子

二月

宋公伐邾圍蟲三月取之乃盡歸鄆俘

夏五月戊辰許世子止弑其君買

左傳夏許悼公瘡五月戊辰飲太子止之藥卒太子

奔晉書曰弑其君君子曰盡心力以事君舍藥物可

也杜曰止獨進藥不由醫公羊傳止進藥而藥

殺也穀梁傳不弑而曰弑責止也止曰我與夫弑

者不立乎其位以與其弟廸哭泣歔飭粥嗑不容粒

未踰年而死故君子即止自責而責之也 胡傳自

小人之情度之世子弑君欲速得其位而止無此心
故曰我與夫弑者不立乎其位哭泣歡飢粥嗑不容
粒未踰年而死無此心故被以大惡而不受自君子
聽之止不嘗藥是忽君父之尊而不慎也而止有此
心忽君父之尊而不慎此篡弑之萌堅氷之漸而春
秋之所謹也有此心故加以大惡而不得辭書許世
子止弑君乃除惡於微之意也 張洽問於朱子曰

嘗讀歐陽公論許世子止之事未免疑之及讀胡文定公傳未足以破其疑洽既而考之左氏公羊之傳自明但後人因穀梁不嘗藥之說遂執此一句以為止之罪如此而已殊不考左氏曰許悼公瘡飲世子止之藥卒公羊曰止進藥而藥殺也此可以見悼公之死於藥矣當是之時雖未有明文而洽嘗觀近世治瘡者以砒霜煨而餌之多愈然不得法不愈而反殺人者亦多矣悼公之死必此類也不然當時所進

非必死之藥止偶不嘗而已則公羊何以謂之藥殺
世子亦何為遽棄國而出奔孟子曰殺人以挺與刃
有以異乎以刃與政有以異乎進藥而藥殺可不謂
之弑哉其所以異於商臣蔡般者過與故之不同耳
心雖不同而春秋之文一施之者以臣子之於君父
不可過也如此觀之似足以正近世傳經之失而破
歐公之疑不識先生以為何如朱子曰胡文定通旨
中引曾吉父說如律中合御藥誤不如本方造御舟

誤不堅固之類已有此意矣但考之於經不見許止
棄國出奔之事不知果何謂也 仁山金氏曰履祥
按古今亂臣賊子弑其君者蓋亦多故有以藥物弑
者霍顯王莽梁冀之徒是也又有雖無弑逆之意而
以奇藥誤其君者山人柳泌之徒是也故律謂藥不
依本方致殺人者與故殺同而天子升遐侍醫視疾
無狀者死蓋謹亂賊之防也止雖無弑君之心然不
幸而進藥而卒故夫子因其所自咎者又立此法其

諸以示萬世之防也與

已卯地震

附左傳楚子為舟師以伐濮南夷費無極言於楚子曰

晉之霸也邇於諸夏而楚僻陋故弗能與爭若大城

城父

今襄城城父縣

而寘太子焉以通北方王收南方是得

天下也王說從之故太子建居於城父令尹子瑕

聘於秦拜夫人也

秋齊高發帥師伐莒

左傳齊高發帥師伐莒莒子奔紀鄆

莒邑東海贛榆縣東北有紀城

冬莖許悼公

公羊傳賊未討何以書莖不成於弑也樂正子春

曾子

弟之視疾也復加一飯則脫然愈復損一飯則脫然

愈復加一衣則脫然愈復損一衣則脫然愈

脫然疾除貌也

言消息得其節

止進藥而藥殺是以君子加弑焉爾曰許世

子止弑其君買是君子之聽止也莖許悼公是君子

之赦止也赦止者免止之罪辭也

明止但得免罪不得繼父後許男斯

代立無惡
大是也

穀梁傳曰卒時葬不使止為弑父也曰

子既生不免乎水火母之罪也羈貫

謂交午剪髮以為飾

成童

八歲以上

不就師傳父之罪也就師學問無方心志不通

身之罪也心志既通而名譽不聞友之罪也名譽既聞有司不舉有司之罪也有司舉之王者不用王者之過也許世子不知嘗藥累及許君也按君弑賊不討不書葬者非史策故不書也亦非孔子削之以為義例也大凡君弑賊不討必是賊自當國不肯禮

葬其君

崔杼側莊公于北郭之類

不赴於列國列國無由往會其

葬史策何由而書葬某公也哉間有書者或其人隱其罪逆自同繼位之常禮葬其君如蔡般是也或賊已就討或出奔而他人繼葬之如禮列國往會如許止既奔而斯繼之是也公穀不知此義乃以君弑賊不討不書葬為春秋定例至于悼公書葬謂之赦止恐非經旨

二十年春王正月

附左傳費無極言於楚子曰建與伍奢將以方城之外叛自以為猶宋鄭也齊晉又交輔之將以害楚其

事集矣王信之問伍奢伍奢對曰君一過多矣

謂納建妻

何信於讒王執伍奢

念奢切言伍奢將以方城之外叛王問伍

按費無極言建與

奢則奢猶可言也盡言明建之無他不入而見執則無如之何今乃直云王一過多矣何信于讒王方信

讒又切言以激之奢亦未盡也

使城父司馬奮揚殺太子未至而使

遣之

知太子寬故遣令去

三月太子建奔宋王召奮揚奮揚使

城父人執已以至王曰言出於余口入於爾耳誰告

建也對曰臣告之君王命臣曰事建如事余臣不佞

不能苟貳奉初以還

奉初命以周旋

不忍後命故遣之既而

悔之亦無及已王曰而敢來何也對曰使而失命召

而不來是再奸也逃無所入王曰歸從政如他日無

極曰奢之子材若在吳必憂楚國盍以免其父召之

彼仁必來不然將為患王使召之曰來吾免而父棠

君尚

奢之長子為棠大夫

謂其弟員

音云

曰爾適吳我將歸死吾

知不逮我能死爾能報聞免父之命不可以莫之奔

也親戚為戮不可以莫之報也奔走免父孝也度功

而行仁也

仁者貴成功

擇任而往知也

員任報讐

知死不避勇

也

尚為勇

父不可棄

俱去為棄父

名不可廢

俱死為廢名

爾其勉

之相從為愈伍尚歸奢聞員不來曰楚君大夫其旰

食乎楚人皆殺之員如吳言伐楚之利于州于

州于吳子

僚公子光曰是宗為戮而欲反其讐不可從也

光吳公子

闔廬員曰彼將有他志

光欲藏僚不利員用事故破其議

余姑為之

求士而鄙以待之

計未得用故進勇士以求入于光退居邊鄙

乃見鱄設

諸

勇士

焉而耕于鄙

夏曹公孫會自鄴出奔宋

鄭莫公反
穀作夢

公羊傳奔未有言自者此其言自何畔也畔則曷為

不言其畔為公子喜時之後諱也

喜時子臧也子臧讓國事見成十三

年君子之善善也長惡惡也短惡惡止其身善善及

子孫穀梁傳自夢者專乎夢也曹無大夫其曰公

孫何也言其以貴取之而不以叛也劉氏曰公羊

云不言其畔為公子喜時之後諱也非也所以諱賢

者之過者謂小不足以妨大短不足以毀長而可以
成人之美者也若乃大惡至叛君專地而猶為之諱
乎 汪氏曰春秋書大夫自叛邑出奔者皆先書叛
故宋華亥向寧華定自南里出奔楚先書入南里以
叛宋公弟辰自蕭來奔先書入蕭以叛此書自鄆出
奔而先不書叛則非叛也蓋鄆乃公孫會繼其父之
食邑而得專制之如穀梁之說爾得罪待放君無赦
命是以自其所食之邑而奔他國也 李氏廉曰此

條書法與宋華向自南里出奔楚同左氏無傳已不可考賈逵及公羊皆以為叛然經不書叛故公羊有為喜時之後諱之說夫叛逆而以其祖父故諱之是管蔡不當誅於周也大傷教矣惟劉氏意林曰春秋之時臣能專其邑無不叛其國者能使其衆無不要其君者深察公孫歸父之至擯奔齊公孫會之自鄭奔宋其賢於臧武仲遠矣此說蓋本穀梁而胡氏亦取之然公孫會之書例之公孫手可矣胡氏亦謂為

賢者之後諱之似鑿 按公羊猶曰諱胡氏直謂其待放而後出奔得去國之禮而賢之矣又曰待放而後出奔臣子常禮免於貶足矣而何以賢之為公子喜時之後賢之也視公羊猶迂曲矣

附左傳宋元公無信多私而惡華向華定華亥與向寧謀曰亡愈于死先諸華亥偽有疾以誘羣公子公子問之則執之夏六月丙申殺公子寅公子御戎公子朱公子固公孫援公孫丁拘向勝向行於其廩

子八

皆公黨 公如華氏請焉弗許遂劫之癸卯取太子樂與

母弟辰公子地以為質辰及地皆元公弟 公亦取華亥之子

無感向寧之子羅華定之子啓與華氏盟以為質

秋盜殺衛侯之兄繫公穀作輒

左傳衛公孟縶輕也齊豹齊惡之子奪之司寇與鄆

豹有役則反之無則取之繫足不良故有役則以官邑還豹使行 公孟

惡北宮喜褚師圃欲去之公子朝通于襄夫人宣姜

靈公嫡母懼而欲以作亂故齊豹北宮喜褚師圃公子朝

作亂初齊豹見宗魯于公孟為驂乘焉將作亂而謂

之曰公孟之不善子所知也勿與乘吾將殺之對曰

吾由子事公孟聞難而逃是僭子也子行事乎吾將

死之內辰衛侯在平壽

衛下邑

公孟有事於蓋獲

衛郭名

之門外齊氏伏甲焉華齊御公孟宗魯驂乘及閔中

曲門中

齊氏用戈擊公孟宗魯以背蔽之斷肱以中公

孟之肩皆殺之公聞亂乘驅自閔門入

乘驅乘車而疾驅也閔門

衛城門蓋偏側之門

載寶以出如死鳥

衛地

齊氏之宰渠子召北

宮子

喜也

北宮氏之宰不與聞謀殺渠子遂伐齊氏滅

之丁巳晦公入與北宮喜盟於彭水之上秋七月戊

午朔遂盟國人八月辛亥公子朝褚師圃子玉霄子

高魴出奔晉閏月戊辰殺宣姜三十一年傳曰邾

黑肱以濫來奔賤而書名重地也君子曰名之不可

不慎也如是或求名而不得或欲益而名彰懲不義

也齊豹為衛司寇守嗣大夫作而不義其書為盜邾

庶其莒牟夷邾黑肱以土地出求食而已不求其名

賤而必書此二物者所以懲肆而去貪也 劉氏曰

左氏以齊豹書盜為求名而不得非也豹挾怨憤為
亂耳本無不畏強禦之名不畏強禦之名亦非豹所
求也 穀梁傳盜賤也其曰兄母兄也目衛侯衛侯
累也然則何為不為君也曰有天疾者不得入乎宗
廟輒者何也曰兩足不能相過齊謂之綦楚謂之蹶
女輒反衛謂之輒 李氏廉曰春秋書盜者四尉止也
齊豹也公孫翩也陽虎也皆大夫也任公輔以為豹

非卿故曰盜而陳氏亦曰既奪之司寇則非卿矣恐其說亦是其罪衛侯之說穀梁得之

冬十月宋華亥向寧華定出奔陳

寧公作竄

左傳宋公請於華費遂

大司馬

將攻華氏對曰臣不敢

愛死無乃求去憂而滋長乎

恐穀太子

臣是以懼敢不聽

命公曰子死亾有命余不忍其訇

恥也

冬十月公殺華

向之質而攻之戊辰華向奔陳華登

賢遂之子

奔吳

十有一月辛卯蔡侯廬卒

廬左作廬

附左傳齊侯疥遂疔

疔瘡疾

期而不瘳諸侯之賓問疾

者多在梁丘據與裔歟

二子齊嬖大夫

言于公曰吾事鬼神

豐於先君有加矣今君疾病為諸侯憂是祝史之罪

也諸侯不知謂我不敬君盍誅於祝固史嚚以辭賓

公說告晏子晏子曰不可為也

言非誅祝史所能治

山林之木

衡鹿守之澤之萑蒲舟鮫守之藪之薪蒸虞侯守之

海之鹽蜃祈望守之

衡鹿舟鮫虞侯祈望皆官名言公專山澤之利不與民共縣

鄙之人入從其政偏介之關

近關

暴征其私

鄭玄云古者竟上乃

為關自竟至國更無關也齊於竟內更復置關縣鄙之人入從國役而又征其私也承嗣大夫

世位者強易其賄布常無藝徵斂無度宮室日更淫樂

不違內寵之妾肆奪於市外寵之臣僭令於鄙民人

苦病夫婦皆詛祝有益也詛亦有損聊攝以東

齊西界也

平原聊城縣姑尤以西齊東界也姑水尤水皆東北有攝城在城陽郡東南入海其為人也多

矣雖其善祝豈能勝億兆人之詛君若欲誅於祝史修德而

後可公說使有司寬政毀關去禁薄斂已責十二月齊侯

田於沛至自田晏子侍于遄臺子猶

梁丘據

馳而造焉公曰惟

據與我和夫晏子對曰據亦同也焉得為和公曰和與同異

乎對曰異和如羹焉水火醯醢鹽梅以烹魚肉燂之以薪

燂煇

也宰夫和之齊之以味濟其不及以洩其過君子食之以

平其心君臣亦然君所謂可而有否焉臣獻其否以
成其可君所謂否而有可焉臣獻其可以去其否是
以政平而不干民無爭心今據不然君所謂可據亦
曰可君所謂否據亦曰否若以水濟水誰能食之

二十有一年春王三月葬蔡平公

夏晉侯使士鞅來聘

書聘止此

宋華亥向寧華定自陳入于宋南里以叛

叛公作畔

左傳宋華費遂

時為大司馬

生華貍

勅俱反

華多僚華登貍

為少司馬多僚為御士

公御士

與貍相惡乃譖諸公曰

貍將納亡人亟言之公曰司馬以吾故亡其良子

謂華

登死亡有命吾不可以再亡之對曰君若愛司馬則

如亡

言愛司馬則當亡走失國

死如可逃何遠之有

言亡可以逃死勿慮其遠

以恐動公公懼使侍人召司馬之侍人宜僚飲之酒而使

告司馬

告司馬使逐軺

司馬嘆曰必多僚也吾有讒子而弗

能殺吾又不死抑君有命可若何乃與公謀逐華軺

將使田孟諸而遣之公飲之酒厚酬之賜及從者司

馬亦如之張匄

華軺臣

尤之

怪賜之厚

曰必有故使子皮

華軺

承宜僚以劔而訊之宜僚盡以告張匄欲殺多僚子

皮曰司馬老矣登之謂甚吾又重之不如亡也五月

丙申子皮將見司馬而行則遇多僚御司馬而朝張

匄不勝其怒遂與子皮白任鄭翩

任翩亦華軺家臣

殺多僚

劫司馬以叛而召亡人壬寅華向入樂大心豐愆華

掣禦諸橫

梁國睢陽縣南有橫亭

華氏居廬門

宋東南城門

以南里

叛六月庚午宋城舊鄘

故城

及桑林之門

城門名

而守之

胡傳南里宋城內之里名也傳稱華氏居廬門以

南里叛而宋城舊鄘及桑林之門以守是華氏與宋

分國而居矣故其入其出皆以南里繫之宋汪氏

曰穀梁云南里宋之南鄙非也不言邑而繫之宋為

宋城內之里名無疑矣又曰叛直叛也謂直叛而不

作亂夫外挾吳楚之援將以覆其宗國其君幾不免
猶曰不作亂邪其書自陳陳亦有罪矣以奔亡之臣
而能入國為亂非陳助之不能也晉荀吳會齊衛曹
之師以救宋而不書圍宋南里者悼公圍彭城則以
五大夫歸荀吳救宋而逸賊使華向邲於誅故不以
討叛予之也

秋七月壬午朔日有食之

左傳公問于梓慎曰是何物也禍福何為對曰二至

二分日有食之不為灾日月之行分同道也至相過也其他月則為灾陽不克也故常為水二分日夜等故言同道二至長短極故相過理必相侵故言不為灾按詩十月之交朔日辛卯日有食之亦孔之醜周之十月夏之八月秋分之月也而甚可醜惡七年四月甲辰朔日食春分之月也而云魯衛惡之安在其不為灾邪梓慎不能因公之問告以省德消變之實而為是說以滋其怠玩卒使出逐應陽微之象

非忠臣也

八月乙亥叔輒卒

輒公作症

附左傳冬十月華登以吳師救華氏齊烏枝鳴

齊大夫

成宋厨人濮

宋厨邑大夫

曰軍志有之先人有奪人之心

後人有待其衰盍及其勞且未定也伐諸若入而固

則華氏衆矣悔無及也從之丙寅齊師宋師敗吳師

于鴻口

梁國睢陽縣東有鴻口亭

獲其二帥華登帥其餘以敗宋

師公欲出

出奔

厨人濮曰吾小人可藉死

可借使死難

而不

能送亡

句

君請待之

待復戰
決勝負

乃徇曰揚徽

也

者公徒

也衆從之

國人皆
揚徽

齊烏枝鳴曰用少莫如齊致死齊

致死莫如去備

備長
兵也

彼多兵矣請皆用劔從之華氏

北復即之厨人濮以裳裹首而荷以走曰得華登矣

遂敗華氏於新里

華氏所
取邑

十一月癸未公子城

以前
年奔

晉今還
救宋

以晉師至曹翰胡

曹大
夫

會晉荀吳

中行
穆子

齊苑

何忌

齊大
夫

衛公子朝

前年出奔
晉今還衛

救宋丙戌與華氏戰

於赭丘

宋地

大敗華氏圍諸南里華亥搏膺而呼見華

軻曰吾為欒氏矣軻曰子無我廷也恐不幸而後亡使

華登如楚乞師華軻以車十五乘徒七十人犯師而

出食于睢上哭而送之乃復入入南楚遂越帥師將

逆華氏太宰犯諫曰諸侯惟宋事其君今又爭國釋

君而臣是助無乃不可乎王曰而告我也後既許之

矣

冬蔡侯朱出奔楚

朱穀
作東

左傳費無極取貨于東國

東國隱太子之子平
侯廬之弟朱叔父也而謂

蔡人曰朱不用命于楚君王將立東國若不先從王欲楚必圍蔡蔡人懼出朱而立東國朱愬於楚楚子

將討蔡無極曰平侯與楚有盟故封

盟于鄧係陳蔡人以國

其

子有二心故廢之

子謂朱也

靈王殺隱太子其子與君同

惡德君必甚又使立之不亦可乎且廢置在君蔡無

他矣穀梁傳東者東國也何為謂之東也王父誘

而殺焉父執而用焉奔而又奔之曰東惡之而貶之

也

奔既罪矣又奔讐國惡莫大焉

汪氏曰或疑此書朱出奔楚後

書東國卒於楚朱無歸入葬之文東國無出奔之事
疑只是一事東即東國而誤為朱也然左傳昭二十
七年記沈尹戌之言亦曰出蔡侯朱而史記蔡世家
亦曰隱太子子東國攻平侯子而代立則朱東國固
兩人也豈穀梁經文因後書東國而誤也與
公如晉至河乃復

左傳公如晉及河鼓叛晉晉將伐鮮虞故辭公

二十有二年春齊侯伐莒

左傳春王二月甲子齊北郭啟

齊大夫

帥師伐莒莒子

將戰苑羊牧之

莒大夫

諫曰齊帥賤其求不多不下

之大國不可怒也弗聽敗齊師於壽餘

莒地

齊侯伐莒

莒子行成司馬竈

齊大夫

如莒涖盟莒子如齊涖盟盟

於稷門

齊城門

之外莒子是大惡其君

宋華亥向寧華定自宋南里出奔楚

左傳楚薳越使告於宋曰寡君聞君有不令之臣為

君憂無寧以為宗羞寡君請受而戮之對曰孤不佞

不能媚於父兄

華向公族故稱父兄

以為君憂拜命之辱抑君

臣日戰君曰余必臣是助亦唯命人有言曰唯亂門

之無過若惠保敝邑無亢不衷以獎亂人孤之望也

唯君圖之楚人患之

知義不直故

諸侯之戍謀曰若華氏

知困而致死楚恥無功而疾戰非吾利也不如出之

以為楚功其亦無能為也已救宋而除其害又何求

乃固請出之宋人從之已巳宋華亥向寧華定華軀

華登皇奄傷省臧士平出奔楚宋公使公孫忌為大

司馬

代費遂

邊印為大司徒

代華定

樂祁為司城仲幾為

左師

代向寧

樂大心為右師

代華亥

樂輓為大司寇以靖

國人

按入春秋亂臣賊子有之矣未有劫其君殺

其羣公子質其太子母弟亡而再入圖危宗社與君

分國而居君臣日戰借敵國之援如宋華向之甚者

也黨乎亂賊為之羽翼者亦有之矣未有借之師以

抗諸侯之討如楚之甚者也楚莊王入陳納公孫寧

儀行父于陳君子猶惡之以為內弗受而強納之制

人之上下使不得其道況遣將帥師以逆隣國不令
之臣曰寡君請受而戮之明為亂臣之地制其君使
無討是豈止于亢不衷獎亂人而已乎樂盈奔楚再
入於曲沃而晉得誅之華向奔陳再入於南里而楚
特脫之楚之右賊而蔑中國也至是極矣夫人之所
以為人中國之所以為中國以有君臣父子也若楚
人者淫名荐食多為不義九鼎可問則無君宮甲可
圍則無父無父無君禽獸而已矣而恃兩廣荆尸之

衆以主中國之盟會則可以制中國之君臣使不得其所於是宋華亥向寧華定自宋南里出奔楚矣豈非禽獸偪人人將相食之明驗乎卒之吳師入郢故臣鞭尸而楚遂以不振身為亂首又獎亂臣天之報施不爽也然遠越之使來告也宋之辭直楚人患之使中國有人秉吾理直之壯宋竭力必討之于內諸侯協心必討之于外區區南里之賊已搏膺而呼旦夕為樂氏之不暇楚知千里勞師以逆亂人得一二

亂人何利于楚而徒失諸侯必亦遁矣而諸侯之戍
遽曰若華氏知困而致死楚恥無功而疾戰非吾利
也不如出之以為楚功固請於宋而宋從之是怠於
救患亦諸侯之罪而佚賊亦宋之罪也故晉荀吳齊
苑何忌衛公子朝曹大夫皆略而不書而書自宋南
里出奔楚交見之矣

大蒐于昌間

間公
作姦

八年秋蒐于紅十一年夏大蒐于比蒲此年春大蒐

于昌間皆三家假蒐禮以數軍實擇材勇強私黨耳
或于秋或于夏或于春不過以蒐事耳意非在應時
禮也文王之時人倫既正爰整于旅朝廷既治無淫
于田是以詩歌庶類蕃殖蒐田以時魯昭之世大夫
不有其君陪臣不有其大夫綱人紀紊於朝廷軍
政之本亡矣而亟蒐之為務出於強家而公不與焉
故屢書以為後戒也昌間魯地

夏四月乙丑天王崩

左傳王子朝

景王之庶長子

賓起

子朝之傅

有寵于景王王與賓

孟

即起也

說

如字

之欲立之劉獻公

劉擊

之庶子伯蚩

劉事狄

單穆公

單旗

惡賓孟之為人也願殺之又惡王子朝之

言

子朝有非分之言

以為亂願去之夏四月王田北山

洛北邙也

使公卿皆從將殺單子劉子王有心疾乙丑崩于榮

錡氏

河南鞏縣有榮錡澗

戊辰劉子摯卒無子單子立劉蚩五

月庚辰見王

見王猛

遂攻賓起殺之盟羣王子於單氏

六月叔鞅如京師

如京師止此

葬景王

王室亂

卷十一

左傳丁巳葬景王王子朝因舊官百工之喪職秩

百官

者與靈景之族以作亂帥郊要餞之甲

三邑周地

以逐劉

子壬戌劉子奔揚

周邑

單子逆悼王

子猛也

于莊宮以歸

王子還

子朝黨

夜取王以如莊宮癸亥單子出王子還

與召莊公

召伯與子朝黨

謀曰不殺單旗不捷與之重盟必

來遂奉王以追單子及領

周地

大盟而復劉子如劉單

子亾乙丑奔于平時

周地

子還之

知王謀故

羣王子追之單子

殺還姑發弱醲延定稠

八子靈景之族

子朝奔京丙寅伐之

單子伐京

京人奔山劉子入於王城辛未鞏簡公敗績于

京乙亥甘平公亦敗焉

甘鞏二公周卿士皆為子朝所敗

胡傳何

言乎王室亂王者以天下為家則以京師為室京師者本也以京師為室王畿為堂諸夏為庭戶四夷為藩籬治外者先自內治遠者先自近本亂而未治者否矣景王寵愛子朝欲以尊奪嫡使至爭亂故言王室亂言其父子兄弟自亂之也

劉子單子以王猛居于皇

左傳單子欲告急于晉秋七月戊寅以王如平時遂

如圃車次于皇

出次以示急

胡傳凡稱以者不以者也

尊不以乎卑貴不以乎賤劉盆

扶粉反

單旗臣也曷為

能以王猛乎猛無寵于景王不能自定其位制在劉

單也按左氏景王太子壽以昭十五年卒至是八年

矣猛與勾皆其母弟禮無疑于當立然久而未立者

王愛庶子朝欲立以為嗣未果而王崩故諸大臣競

立君諸王子爭欲立以正則有猛以寵則有朝猛雖
正而無寵朝雖寵而不正二子廢立皆恃大臣強弱
而後定者也故特稱曰以而景王弱後嗣輕宗社之
罪亦著矣易曰王居无咎稱居于皇者明其有土當
得位之稱也 杜氏曰河南鞏縣西南有黃亭
秋劉子單子以王猛入于王城

左傳劉子如劉單子使王子處守于王城

距子朝

盟百

工于平宮

平王廟

辛卯鄆肸

子朝黨

伐皇大敗獲鄆肸士

辰焚諸王城之市八月辛酉司徒醜以王師敗績于

前城

子朝所取邑

百工叛已巳伐單氏之宮敗焉

百工伐單氏為

單氏所敗

庚午反伐之

單氏反伐百工

辛未伐東園

百工所在

冬十月

丁巳晉籍談荀躒帥九州之戎

州鄉屬也五州為鄉九州戎陸渾戎十七

年滅屬晉

及焦瑕溫原

晉四邑

之師以納王于王城庚申單

子劉蜜以王師敗績于郊前城人

子朝衆

敗陸渾于社

周地

胡傳猛未踰年何以稱王示當立也既當立矣

何以稱名明嗣君也曰王猛者見居尊得正又以別

乎諸王子也君前臣名劉單不名而王名不嫌于例
置乎曰君前臣名常禮也禮當其變臣有不名名具
君而不嫌者矣王不當稱未踰年而稱王名不當稱
立為君而稱猛皆禮之變也惟可與權者能知其變
而不越乎道之中再書劉子單子之以王何也春秋
詞繁而不殺者必有美惡焉劉子單子蓋挾天子以
令諸侯而專國柄者也王猛在喪不稱子而稱王
明正也書名者別子朝也居于皇入于王城而書猛

別嫌也 王猛未踰年是以不可稱天王又不可以
諸侯例稱子也獨言子則似魯之子冠王子子又與
他王子相亂故稱王繫猛 王城天子都而子朝之
黨在焉故言入者難詞也公羊言篡辭穀梁云內
弗受皆妄也

冬十月王子猛卒

左傳王子猛卒不成喪也

釋所以不稱王崩

敬王即位

猛母弟句

館于子旅氏

周大夫

十二月庚戌晉籍談荀躒賈辛司

馬督帥師軍于陰

籍談所軍

于侯氏

荀躒所軍

于谿泉

賈辛所軍

次

于社

司馬督所次

王師軍于汜于解次于任人

王師分在三邑

閏

月晉箕遺樂徵右行詭

三子晉大夫

濟師

渡伊洛

取前城軍

其東南王師軍于京楚

子朝所在

辛丑伐京毀其西南

孫氏曰言王所以明當嗣之人也言子所以見未踰

年之君也言猛所以別羣王子也不崩不葬降成君

也安定胡氏曰生則書王明實為嗣死乃稱子正

未踰年未成天子之至尊李氏廉曰公穀皆以子

猛為篡故卒義不可從

十有二月癸酉朔日有食之

二十有三年春王正月叔孫婁如晉

婁勅畧反公作舍下同

癸丑叔鞅卒

晉人執我行人叔孫婁

左傳邾人城翼

邾邑

還將自離姑

邾邑從離姑則道經魯之武城

公孫

鉏

邾大夫

曰魯將御我欲自武城還循山而南

至武城而還依

山南行不欲過武城

徐鉏丘弱茅地

三子邾大夫

曰道下遇雨將不

出是不歸也遂自離姑武城人塞其前斷其後之木而弗殊邾師過之乃推而蹶之遂取邾師獲鉏弱地邾人愬于晉晉人來討叔孫婼如晉晉人執之書曰

晉人執我行人叔孫婼言使人也晉人使與邾大夫

坐

訟曲直

叔孫曰列國之卿當小國之君固周制也邾

又夷也寡君之命介子服回在請使當之不敢廢周制故也乃不果坐韓宣子使邾聚其衆將以叔孫與之叔孫聞之去衆與兵而朝

示欲以身死

士彌牟謂韓宣

子曰子弗良圖而以叔孫與其讐叔孫必死之魯亡叔孫必亡邾邾君亡國將焉歸子雖悔之何及所謂盟主討違命也若皆相執焉用盟主乃弗與使各居

一館

分別叔孫子服回

士伯聽其辭而愬諸宣子乃皆執之

士伯御叔孫從者四人過邾館以如吏

欲使邾人見叔孫之屈辱

先歸邾子士伯曰以芻蕘之難從者之病將館子于

都

別都謂其也

叔孫旦而立期焉

立待命也從旦至暮為期

乃館諸箕

舍子服昭伯于他邑范獻子求貨於叔孫使請冠焉

取其冠法而與之兩冠曰盡矣為叔孫故申豐以貨

如晉叔孫曰見我吾告女所行貨見而不出

留申豐不使得

出欲以貨免

吏人之與叔孫居于箕者請其吠狗弗與及

將歸殺而與之食之叔孫所館者雖一日必葺其墻

屋去之如始至

晉人圍郊

左傳春王正月壬寅朔二師

王師晉師

圍郊癸卯郊鄩潰

二邑皆子朝所得

丁未晉師在平陰

今河陰縣

王師在澤邑王使

告間

音開

庚戌還

晉師還

按郊子朝邑也不書大夫之

名氏又不稱師而曰晉人微之也所謂以其事而微之者也天子蒙塵晉為方伯不躬率諸侯以赴其急直取子朝以定王位乃徐遣大夫帥偏師薄為之援勤王之義若是乎書晉人圍郊而罪自見矣

夏六月蔡侯東國卒于楚

因朝于楚而卒也穀梁有失德不葬之說東國其是矣王父殺父見用奔而又奔之也

秋七月莒子庚輿來奔

左傳莒子庚輿虐而好劔苟鑄劍必試諸人國人患之又將叛齊烏存

莒大夫

帥國人以逐之庚輿將出聞

烏存執爰而立于道左懼將止死苑羊牧之曰君過之烏存以力聞可矣何必以弑君成名遂來奔齊人

納郊公

著丘公之子

戊辰吳敗頓胡沈蔡陳許之師于雞父胡子髡沈子逞

滅獲陳夏徵舒

父公穀作甫髡苦門反
逞公作楹齒五結反

左傳吳人伐州來楚薳越帥師

令尹以疾從戎故薳越攝其事

及諸

侯之師奔命救州來吳人禦諸鍾離子瑕卒

即令尹不起所

疾也楚師燿

燿子潛反吳楚之間謂火滅為燿軍之重主喪亡故其軍人無復氣勢

吳公

子光曰諸侯從于楚者衆而皆小國也畏楚而不獲

已是以來吾聞之曰作事威克其愛雖小必濟胡沈

之君幼而狂陳大夫夏齧壯而頑頓與許蔡疾楚政

楚令尹死其師燿帥賤多寵政令不一

帥賤薳越非正卿也軍多

王之寵人政令不一于越

七國同役而不同心帥賤而不能整無

大威命楚可敗也若分師先以犯胡沈與陳必先奔

三國敗諸侯之師乃搖心矣諸侯乖亂楚必大奔請

先者去備薄威

示之不整以誘之

後者敦陳整旅吳子從之

戊辰晦戰于雞父吳子以罪人三千先犯胡沈與陳

三國爭之吳為三軍以繫于後中軍從王光帥右掩

餘帥左

掩餘吳王壽夢子

吳之罪人或奔或止三國亂吳師

擊之三國敗獲胡沈之君及陳大夫舍胡沈之囚使

奔許與蔡頓曰吾君死矣師譟而從之三國奔楚師

大奔書曰胡子髡沈子逞滅獲陳夏齧君臣之辭也
不言戰楚未陳也 公羊傳君死於位曰滅生得曰
獲大夫生死皆曰獲 穀梁傳中國不言敗此其言
敗何也中國不敗胡子髡沈子盈其滅乎其言敗
釋其滅也獲陳夏齧獲者非與之辭也 杜氏曰
不書楚楚不戰也雞父楚地安豐縣南有雞備亭

胡傳吳伐州來楚令尹帥師及諸侯之師與吳戰曷
為不書楚令尹既喪楚師已燬六國先敗楚師遂奔

是以不書楚也諸侯之師曷為畧而不序頓胡沈則其君自將蔡陳許則大夫帥師言戰則未陳也言敗績則或滅或獲其事亦不同也或曰滅或曰獲別君臣也君死曰滅胡子髡沈子逞是也生得曰獲秦晉戰於韓原獲晉侯是也大夫生死皆曰獲鄭獲宋華元生也吳獲陳夏齧死也書其敗不以國分而以君大夫為序書其死不以事同而以君臣為別皆所以辨上下定民志雖顛沛必於是也其義行而亂自熄

矣 劉氏曰疑楚本與諸侯同救州來既而令尹卒
楚軍留而諸侯之師先至吳以詭計勝之楚師實未
與吳相接故經不書楚也

天王居于狄泉尹氏立王子朝

朝如字

杜氏曰敬王辟子朝也狄泉今洛陽城內大倉西南
池水也時在城外尹氏周世卿也書尹氏立子朝明
非周人所欲立 敬王始立而遽稱天王者景王崩
已踰年不可曠年無君故稱之且明正也立者不宜

立也稱立而目尹氏見世卿之擅權亂國為後戒也
八月乙未地震

左傳八月丁酉南宮極震甚弘謂劉文公曰周之亡

也三川震今西王之大臣亦震天棄之矣

西王謂子
朝南宮極

其黨

杜氏曰經書乙未地震魯地也丁酉南宮極震

周地亦震也為屋所壓而死三川涇渭洛也地動川

岸崩謂幽王時 楚太子建之母在鄭召吳人而啟

之冬十月甲申吳太子子樊入鄭

孔氏曰吳子過號
諸樊王僚是過之

弟子何容僚子乃取
過號為名恐傳寫誤取楚夫人與寶器以歸楚司馬

遂越追之不及將死衆曰請遂伐吳以徼之遂越曰

再敗君師死且有罪亡君夫人不可以莫之死也乃

縊于遂澁

楚地

杜氏曰鄭鄖陽也平王娶秦女廢太

子建故母歸其家

鄭古聞反

冬公如晉至河有疾乃復

至河下公穀又有公字

左傳公為叔孫故如晉及河有疾而復

附楚囊瓦

子囊乏孫子常也代陽句

為令尹城郢沈尹戌日子常

必亡郢苟不能衛城無益也古者天子守在四夷天子
卑守在諸侯諸侯守在四隣諸侯卑守在四竟慎
其四竟結其四援民狎其野三務成功民無內憂而
又無外懼國焉用城今吳是懼而城于郢守已小矣
卑之不獲能無亡乎若敖蚡冒至于武文土不過同
慎其四竟猶不城郢今土數圻而郢是城不亦難乎
二十有四年春王二月丙戌仲孫貜卒

婁至自晉

公有叔孫
字婁作舍

按左氏穀梁無叔孫字左氏曰媼至自晉尊晉也杜預曰貶媼族所以尊晉媼行人故不言罪已蓋以意如至自晉傳言尊晉罪已意如以罪見執宜在罪已媼本使人不應見執故尊晉而已內大夫行還皆不書至異于公也今此二人執而見釋更以書至見義也今按生事疆場侵奪寡小罪在季氏而晉不能討徒能加怒于使人君子蓋賤晉之偷也何尊晉之有若以為推魯之心魯之于晉畏威而強服亦未必知

罪而悔則尊晉罪已亦非魯人之心也意如之不氏
一事而再見卒名耳媯公羊作舍而有叔孫字胡氏
因以為春秋特書氏以賢之恐亦未必經意也媯父
子皆因季氏見執季武子伐莒取鄆叔孫豹見執于
會趙文子求貨于叔孫而弗與至是邾人城翼未嘗
我犯而襲取其師蓋亦季氏之謀也叔孫媯又見執
于晉范獻子求貨而又弗與昔晉歸意如子服惠伯
曰合諸侯而執其老若曰無罪而惠免之請從君惠

于會晉人患之使叔魚見季孫曰歸子而不歸鮒也
聞諸吏將為子除館于西河季孫懼而逃歸叔孫姑
聞將館于箕則立而待命從旦至暮從容不屈晉人
卒禮而歸之由是觀之姑與意如之賢不肖遠矣

附左傳三月庚戌晉侯使士景伯涖問周故

就問子朝敬王

知誰曲直

士伯立于乾祭

王城北門

而問于介

也

衆晉人乃辭

王子朝不納其使

夏五月乙未朔日有食之

左傳梓慎曰將水

陰勝陽故

昭子曰旱也日過分而陽猶

不克克必甚能無旱乎

按梓慎叔孫皆妄測天道

或傳者因時之旱而附會也日食之示戒遠矣非為水旱也日過分而陽猶不克克必甚此流行之氣也日月陰陽之精也以精之盛衰相為虧蝕水旱之故不相及也

附左傳六月壬申王子朝之師攻瑕及杏

敬王邑

比皆潰

鄭伯如晉子太叔相見范獻子獻子曰若王室何對

曰老夫其國家不能恤敢及王室抑人亦有言曰釐

不恤其緯而憂宗周之隕為將及焉

釐寡婦也寡婦織不憂其緯之

不繼而憂周之隕為將及已

今王室實蠢蠢

動機貌

焉吾小國懼矣

然大國之恥也吾儕何知焉獻子懼而與宣子

韓起圖

之乃徵會于諸侯期以明年

秋八月大雩

丁酉杞伯郁釐卒

郁公作鬱

冬吳滅巢

左傳楚子為舟師以略吳疆

畧行也行吳界將侵之

沈尹戌曰

此行也楚必亡邑不撫民而勞之吳不動而速之吳

踵楚而疆場無備邑能無亡乎越大夫胥犴勞王于

豫章之汭水曲越公子倉歸王乘舟倉及壽夢帥師從

王壽夢大夫王及圍陽楚地而還吳人踵楚而邊人不備遂

滅巢及鍾離而還沈尹戌曰亡郢之始于此在矣王

壹動而亡二姓之帥謂守巢與鍾離大夫幾如是而不及郢

胡傳巢楚之附庸實邑之也書吳入州來著陵楚之

漸書吳滅巢著入郢之漸

葬杞平公

二十有五年春叔孫婼如宋

左傳叔孫婼聘于宋宋公享昭子明日宴飲酒樂宋

公使昭子右坐

以相近言
改禮坐

語相泣也樂祁佐退而告

人曰吾聞之哀樂而樂哀皆喪心也心之精爽是謂

魂魄魂魄去之何以能久季公若

平子庶叔父

之姊

平子庶姑

與公若
同母

為小邾夫人生宋元夫人

平子之外姊

生子以妻

季平子昭子如宋聘且逆之公若從

從昭子

謂曹氏

宋元

夫勿與魯將逐之曹氏告公公告樂祁樂祁曰與之

如是魯君必出政在季氏三世矣

文子武子平子

魯君喪政

四公矣

宣成襄昭

無民而能逞其志者未之有也靖以待

命猶可動必憂杜氏曰平子人臣而因卿逆季氏

強橫

夏叔詣會晉趙鞅宋樂大心衛北宮喜鄭游吉曹人邾

人滕人薛人小邾人于黃父

詣五計反公穀作倪音詣後同大心公作世心後同

父音

甫

左傳夏會于黃父謀王室也趙簡子鞅令諸侯之大

夫輸王粟具戍人曰明年將納王子太叔見趙簡子

簡子問揖讓周旋之禮焉對曰是儀也非禮也簡子

曰敢問何謂禮對曰吉也聞諸先大夫子產曰夫禮

者天之經也道之常地之義也利之宜民之行也人所履天

地之經而民實則之則天之明日月星辰因地之性

高下剛柔生其六氣陰陽風雨晦明用其五行金木水火土氣為

五味發為五色章為五聲淫則昏亂民失其性滋味聲色

過則傷性是故為禮以奉之使不失性為六畜馬牛羊犬豕雞五牲麋鹿

麋狼三犧祭天地宗廟三者之牲曰犧以奉五味為九文山龍華蟲以下

九章六采畫續之事雜用天地四方之色青與白赤與黑玄與黃皆相次五章青與赤謂之文

赤與白謂之章白與黑謂之黼黑與青謂之黻五色備謂之繡以奉五色為九歌八

風七音六律以奉五聲九歌九功之德皆可歌也六府三事謂之九功八風八方

之風七音宮商角徵羽變宮徵也六律陰律六陽律六為君臣上下以則地義

君上治臣下承以法地之高下為夫婦內外以經二物夫治外婦治內各治其物

以法地之剛柔地為父子兄弟姑姊甥舅昏父妻媾重昏

姻

婿父

亞

兩婿相謂

以象天明

日月星辰猶親屬之相繫其明有大小之象其躋離遠近

有親跡之象

為政事庸力行務以從四時

在君為政在臣為事民功曰庸

治功曰力行其德教務其時要禮之本也

為刑罰威獄使民畏忌以類其

震曜殺戮

雷電震曜秋冬殺戮天之威也刑象之

為溫慈惠和以效天

之生植長育

春生夏長雨露滋培天之惠也德象之

民有好惡喜怒哀

樂生于六氣

情志之感稟六氣而生

是故審則

可否之宜

宜類

輕重之等

以制六志

使不過節

哀有哭泣樂有歌舞喜有施舍怒有

戰鬪喜生于好怒生于惡是故審行信令禍福賞罰

以制死生生好物也死惡物也好物樂也惡物哀也
哀樂不失乃能協于天地之性是以長久簡子曰甚
哉禮之大也對曰禮上下之紀天地之經緯也民之
所以生也是以先王尚之故人之能自曲直以赴禮
者

猶言能自矯揉以合
禮之節不徇情也

謂之成人夫不亦宜乎 張

氏曰黃父即黑壤晉地

按敬王初立子朝多黨然

晉一徵會而諸侯響應是知邪不勝正久矣然此王
事也而無美辭何也王室不靖于今四年矣晉蓋徐

徐馬其君不親又待來年迨王室之將定而竊其功
故書辭如此

有鸛鵒來巢

鸛其俱反稽康音權本又作
鵒音幼公作鸛音權鵒音欲

左傳書所無也

傳載童謠明言昭公
出辱之事不足信

公羊傳何以

書記異也何異爾非中國之禽也宜穴又巢也考

工記鸛鵒不踰濟注云不踰濟無妨中國有也何

休曰自下居上之徵

秋七月上辛大雩季辛又雩

左傳秋書再雩旱甚也杜氏曰季辛下旬之辛也

九月己亥公孫于齊次于陽州

己亥穀作乙亥孫音遜陽公作楊

左傳初季公鳥

平子庶叔父公若之兄

娶于齊鮑文子生申公

鳥死季公亥

即公若

與公思展

季氏族

與公鳥之臣申夜

姑相其室及季姒

公鳥妻鮑文子女

與甕人檀通而懼乃使

其妾扶已以示秦遄

魯大夫

之妻

公鳥妹秦姬也

曰公若欲使

余余不可而扶余又訴于公甫

平子弟

曰展與夜姑將

要余秦姬以告公之

亦平子弟也

公之與公甫告平子平

子拘展于卞而執夜姑將殺之公若泣而哀之曰殺是是殺余也將為之請平子使監勿內日中不得請

有司逆命

迎受殺生之命

公之使速殺之故公若怨平子季

郈之雞鬪季氏介其雞

為雞著甲高誘注呂氏春秋云鐘著雞頭

郈氏為

之金距平子怒

以其不下已

益宮于郈氏

侵彼以自廣

且讓

責也

之故郈伯亦怨平子臧昭伯

臧為子

之從弟會為讒于

臧氏而逃于季氏臧氏執旃平子怒拘臧氏老將禘

于襄公萬者二人其衆萬于季氏臧孫曰此之謂不

能庸先君之廟大夫遂怨平子公若獻弓于公為

公為

昭公子
務入

且與之出射于外而謀去季氏公為告公果

公賁

果賁皆
公為弟

公果公賁使侍人僚祖告公公寢將以

戈擊之乃走公曰執之亦無命也懼而不出數月不

見公不怒又使言公執戈以懼之乃走又使言公曰

非小人之所及也公果自言公以告臧孫臧孫以難

如字難下恐
合有辭字

告邱孫邱孫以可勸告子家懿伯

子家
羈莊

公立
孫

懿伯曰讒人以君徼幸事若不克君受其名不

可為也舍民數世以求克事不可必也且政在焉其
難圖也公退之辭曰臣與聞命矣言若洩臣不獲死
乃館于公叔孫昭子如闕魯邑公居于長府九月戊戌
伐季氏殺公之于門遂入之平子登臺而請曰君不
察臣之罪使有司討臣以干戈臣請待於沂上以察
罪弗許魯城南自沂水請囚于費弗許請以五乘亡弗許
子家子曰君其許之政自之出久矣隱民多取食焉
為之徒者衆矣日入慝姦惡作弗可知也衆怒不可蓄

也季氏衆蓄而弗治將蕙蕙蓄民將生心生心同求將

合君必悔之弗聽邠孫曰必殺之公使邠孫逆孟懿

子仲孫何忌叔孫氏之司馬驪戾言于其衆曰若之何莫

對衆疑所助又曰我家臣也不敢知國凡有季氏與無於

我孰利皆曰無季氏是無叔孫氏也驪戾曰然則救

諸帥徒以往陷西北隅以入陷公圍也公徒釋甲執冰而

踞冰擯丸蓋擯丸箭箭也其蓋可以取飲遂逐之逐公徒孟氏使登西北

隅以望季氏見叔孫氏之旌以告孟氏執邠昭伯殺

之于南門之西遂伐公徒子家子曰諸臣僞劫君者

而負罪以出君止

使若非君本意者君自可止不出

意如之事君也

不敢不改公曰余不忍也與臧孫如墓謀

辭先君且謀所奔

遂行己亥公孫于齊次于陽州

杜氏曰陽州齊魯

竟上邑未敢直前故次于竟

程子曰人君之尊雖

屯難之世于其名位非有損也唯其施為有所不行

德澤有所不下是屯其膏既膏澤有所不下是威權

不在己也威權去己而欲驟正之求凶之道魯昭公

高貴鄉公之事是也故小貞則吉小貞則漸正之也
若盤庚周宣修德用賢以道馴致為之不暴也 按
史記是年孔子適齊答景公問政有君君臣臣父父
子子之語斯言人但知其為景公而發不知其微意
所在殆亦為魯事而發也使齊能用孔子豈但齊國
之君臣父子定魯之君臣父子亦定矣聖人以此正
天下王道可興焉又豈但齊無陳氏之禍昭公可以
速正反本不至于乾侯再辱而已哉

齊侯唁公于野井

唁音彥

左傳齊侯將唁公于平陰公先至于野井齊侯曰寡人之罪也使有司徒于平陰為近故也齊侯曰自莒

疆以西請致千社

二十五家為社千社二萬五千家欲以給公

以待君命

待君伐季氏之命

寡人將帥敝賦以從執事唯命是聽君之

憂寡人之憂也子家子曰天祿不再天若祚君不過

周公以魯足矣失魯而以千社為臣誰與之立且齊

君無信不如早之晉弗從杜氏曰濟南祝阿縣東

有野井亭齊侯來唁公公不敢遠勞故逆之往至野

井公羊傳昭公將弒季氏告子家駒子家駒曰牛

馬維婁

繫馬曰維
繫牛曰婁

委已者也

委食已者

而柔焉

言牛馬之
維婁乃同

已者實為之而服聽焉物固受制于鼻息
我者也魯國之人維婁于季氏也久矣

季氏得民

衆久矣君無多辱焉昭公不從其言而敗焉走之齊

齊侯唁公于野井昭公噉然而哭諸大夫皆哭以人

為舊

舊周垣也

以臂為席

臂車覆簞

以鞍為几以遇禮相見

穀梁傳弔失國曰唁趙氏曰弔生曰唁詩歸唁

衛侯

冬十月戊辰叔孫婁卒

左傳昭子自闕歸見平子平子稽顙曰子若我何昭

子曰人誰不死子以逐君成名子孫不忘不亦傷乎

將若子何平子曰苟使意如得改事君所謂生死而

肉骨也昭子從公子齊與公言子家子命適公館者

執之

恐從者知叔孫謀

公與昭子言于幄內曰將安衆而納

公公徒將殺昭子

昭子謀歸安衆而後納公則獨公得入從公伐季氏者不得入故欲

殺昭子

伏諸道左師展告公公使昭子自鑄歸

辟伏兵也

平

子有異志

不欲復納公

冬十月辛酉昭子齊于其寢使祝

宗祈死戊辰卒

恥為平子所欺因祈而自殺

左師展將以公乘馬

而歸公徒執之

展魯大夫欲與公俱輕歸古者服牛乘馬馬以駕車不單騎也至六國時

始有單騎蘇秦所云車千乘騎萬匹是也曲禮云前有車騎禮記漢世書耳

李廉曰昭

公之禍原于叔孫氏之司馬昭子既歸倘正黷戾之

罪而誅之亦庶足以翦季氏之羽翼而徐為之圖今

乃付之無可奈何不及甯俞遠矣祈死之說不可信

按平子雖有異志改立君其所未敢也昭子而在則納公之事昭子以身任之通內外安衆心必克有成而後已此固昭子之心也何至遂祈死而自裁乎此年春昭子在宋樂祁已知其將死則昭子實壽終耳季氏逐君為之徒者衆矣昭子謀歸安衆而後納公蓋欲安助季氏伐公徒之衆也無季氏是無叔孫氏也三家同情使叔孫不如闢必不能助公以伐季氏矣而可望以誅驪戾乎

十有一月己亥宋公佐卒于曲棘

左傳宋元公為公故如晉卒于曲棘 公羊傳曲棘

者何宋之邑也諸侯卒其封內不地此何以地憂內也 杜氏曰曲棘宋地陳留外黃縣城中有曲棘里

胡傳宋元意如之外舅而求納公是以正倫恤患為心而不匿其私親之惡者也故雖卒于封內而特書其地以別之也

十有二月齊侯取鄆

公羊傳外取邑不書此何以書為公取之也 穀梁

傳取易辭也內不言取以其為公取之故易言之也

家氏曰是時晉政已衰霸權未有所屬齊景有志

修桓公之業當請命天王號召與國納昭公于魯戮

意如以示天下而霸政舉矣乃以取鄆為首務姑塞已

責勇于義者不爾 按取魯邑以處公蓋無意於

納公也使移圍鄆之師直指魯郊問昭公出故執意

如歸之京師復昭公于魯則齊之義聲振于天下矣

二十有六年春王正月葬宋元公

三月公至自齊居于鄆

左傳言魯地也 杜氏曰入魯竟故書至猶在外故
書地 自是每歲公行必書至書居凡五見及鄆潰
乃書公在乾侯曰居雖非其所猶吾土也曰在者非
吾土矣

夏公圍成

左傳夏齊侯將納公命無受魯貨申豐從女賁

二人皆季

臣以幣錦二兩二犬為一端二端為一兩所謂匹也二兩二匹縛一如瑱

瑱充耳縛卷也急卷使如充耳易懷藏適齊師謂子猶梁丘據之人高齎

子猶家臣能貨子猶為高氏後粟五千庾言若能為我行貨于子猶當為

請使得為高氏後又當致粟五千庾庾十六斗凡八千斛高齎以錦示子猶子猶

欲之齎曰魯人買之百兩一布以道之不通先入幣

財言魯人買此甚多布陳之以百兩為數子猶受之言于齊侯曰羣臣

不盡力于魯君者非不能事君也然據有異焉宋元

公為魯君如晉卒于曲棘叔孫昭子求納其君無疾

而死不知天之棄魯耶抑魯君有罪于鬼神故及此

也君若待于棘

十年傳云栢子召子山而反棘焉杜云齊國西安縣東有戟里亭此即彼

棘也本無曲字今世本誤

使羣臣從魯君以卜焉

卜知可伐否

若可師

有濟也君而繼之茲無敵矣若其無成君無辱焉齊

侯從之使公子鉏帥師從公

鉏齊大夫

成大夫公孫朝謂

平子曰有都以衛國也請我受師

以成邑受齊師

許之請納

質

恐見疑

弗許曰信女足矣告于齊師曰孟氏魯之敝

室也用成已甚弗能忍也請息肩於齊

詐降以致齊師圍成使魯

得為

齊師圍成人伐齊師之飲馬于淄

水出泰山梁父縣西

北入

者曰將以厭衆

以厭衆心不欲使知已降也

魯成備而後告

曰不勝衆

言衆不欲降

師及齊師戰于炊鼻

魯地

按齊侯

謀納公幸臣梁丘據餌季氏之貨獻謀于齊侯而齊

侯聽之使公子鉏帥師從公則當書公以齊師圍成

否則曰公及齊師圍成可也而曰公圍成者惡齊之

為利回為義疚以為雖得其師不足以也為齊侯者

當昭公次于陽州之時悉賦以從直造魯都詰其罪

人而戮之則一舉而事定大義申矣而乃唁之野井
是拒其適已也取鄆以居之是示不急納之也遷延
而為是師身不自臨將非正卿使公子鉏帥師從公
以卜可伐而已齊之無能為季氏知之矣故使成大
夫偽降以牽留齊師成備而後薄與之戰齊人皆無
闕心所謂若其無成君無辱焉持是以復于齊侯齊
侯亦姑有所藉口以塞魯君之意而已夫以討罪之
舉而區區圍一邑昭公將其偏師不恥與大夫同事

而亦區區自圍其一邑季氏貨餌幸臣遥制齊侯之心腹按兵國都以遥竟之一邑受其師吾君在焉而以有司常隸敵而與之亢齊之罪季氏之惡與昭公之無復反之兆也具見之矣 杜氏曰成孟氏邑不書齊師帥賤衆少重在公

秋公會齊侯莒子邾子杞伯盟于鄆陵

鄆音專又市轉反

左傳謀納公也 杜氏曰鄆陵地闕

公至自會居于鄆

九月庚申楚子居卒

左傳楚平王卒令尹子常欲立子西

平王之長庶

曰太子

壬

昭王

弱其母非適也王子建實聘之子西長而好善

立長則順建善則治王順國治可不務乎子西怒曰

是亂國而惡君王也

言王子建聘之是章君王之惡

國有外援

秦也

可瀆

慢也

也王有適嗣不可亂也敗親速讎

不立壬秦將來討

亂嗣不祥我受其名賂吾以天下吾滋不從也楚國

何為必殺令尹令尹懼乃立昭王

冬十月天王入于成周

左傳晉荀躒

音歷

趙鞅帥師納王使女寬

晉大夫

守闕塞

洛陽西南伊闕也守之脩子朝

王入于成周晉師使成公般

晉大夫

戍

周而還 安定胡氏曰因狄泉故稱入 孫氏曰子

朝之亂甚矣悼王既死敬王即位于外四年始反正

于宗廟不言歸而言入者言歸嫌與即位于內者同

故變文言入以著即位于外也 陳氏曰惠王出入

皆不書襄王雖書出猶不書入也於是悼王自皇敬

王自狄泉則曷為皆書入幸之也王室亂矣入無足
諱焉爾按漢河南縣即郊鄆武王遷九鼎周公營
以為都是為王城漢洛陽縣周公營下都以遷殷民
是為成周王城曰東都蓋以鎬京為周之西都相對
而言也成周為下都蓋以王城為洛之上都相對而
言也平王東遷定都于王城子朝之亂王城為所據
故敬王入于成周而居焉後竟定都成周左氏叙王入成周
在子朝奔楚之後今依經正之成周既天子之都則

不曰入于京師何也京師衆大之稱自諸侯言則曰如京師歸之于京師必以衆大言之以示所尊也自天王自言則曰入于王城入于成周直以地名書之足矣或謂著其衰弱齊于列國故不稱京師非也

尹氏召伯毛伯以王子朝奔楚

左傳晉師克鞏

知躒趙鞅之師

王子朝及召氏之族毛伯得

尹氏固南宮嚳奉周之典籍以奔楚

按經書召伯傳言召氏之族杜

預以召伯當云召氏

王子朝使告于諸侯曰單旗劉狄剝亂天

下晉為不道是攝是贊茲不穀震蕩播越竄在荆蠻
未有攸底昔先王之命曰王后無適則擇立長年鈞
以德德鈞以卜王不立愛公卿無私古之制也穆后
及太子壽早夭即世單劉贊私立少以間先王唯伯
仲叔季圖之何氏曰立子朝獨舉尹氏出奔并舉
召毛者明本在尹氏當誅首惡然後治其黨

附左傳齊有彗星

出齊之分野

齊侯使禳之晏子曰無益

也祇取誣焉天道不謫不貳其命若之何禳之且天

之有彗也以除穢也君無穢德又何禳焉若德之穢
禳之何損齊侯與晏子坐于路寢公嘆曰美哉室具
誰有此乎晏子曰敢問何謂也公曰吾以為在德對
曰如君之言其陳氏乎陳氏雖無大德而有施于民
豆區釜鍾之數其取之公也薄其施之民也厚公厚
斂焉陳氏厚施焉民歸之矣公曰是可若何對曰惟
禮可以已之在禮家施不及國大夫不收公利公曰
善哉吾不能矣吾今而後知禮之可以為國也對曰

禮之可以為國也久矣與天地並君令臣共父慈子孝兄愛弟敬夫和妻柔姑慈婦聽禮也君令而不違臣共而不貳父慈而教子孝而箴諫也兄愛而友弟敬而順夫和而義妻柔而正姑慈而從從不自專婦聽而婉禮之善物也

二十有七年春公如齊公至自齊居于鄆

夏四月吳弑其君僚

左傳吳子欲因楚喪而伐之

前年楚平王卒

使公子掩餘公

子燭庸

二子皆王僚母弟

帥師圍潛

楚邑在廬江六縣西南

使延州來

季子聘于上國

季子本封延陵後復封州來故曰延州來

遂聘于晉以觀

諸侯楚莠尹然王

一作工

尹廩帥師救潛

二尹楚官能廩其名

左

司馬沈尹成帥都君子與王馬之屬以濟師

都君子在都邑

之士有復除者王馬之屬王之養馬官屬校人也濟益也

與吳師遇于窮令尹子

常以舟師及沙

水名

汭而還左尹卻宛工尹壽帥師至

于潛吳師不能退

楚師強故吳不得退去

吳公子光曰此時也

不可失也

欲因其師徒在外國不堪後以弑王

告鮒設諸曰上國有言

曰不索何獲我王嗣也

光吳王諸樊子也

吾欲求之事若克

季子雖至不吾廢也鮪設諸曰王可弑也母老子弱

是無若我何

猶言我無若是何欲以老弱托光

光曰我爾身也夏四

月光伏甲于堀室

堀地為室

而享王王使甲坐于道及其

門

坐道達至光門

門堦戶席皆王親也夾之以鉞

普皮反劍也

羞

者獻體改服于門外

羞進食也獻體解衣

執羞者坐行

膝行

而入

執鉞者夾承之及體以相授也

鉞及進羞者體以傳授食

光偽足

疾入于堀室

恐難作王黨殺已素辟之

鮪設諸寘劍于魚中以進

全魚

抽劍刺王鉞交于胸遂弑王闔廬以其子為卿

季子至曰苟先君無廢祀民人無廢主社稷有奉國

家無傾乃吾君也吾誰敢怨哀死事生以待天命非

我生亂立者從之先人之道也復命哭墓

復使命于僚墓復

位而待

復本位侍光命

吳公子掩餘奔徐公子燭庸奔鍾吾

小楚師聞吳亂而還

言聞吳亂明郤宛不取賂而還

杜氏曰僚亟

戰民罷又伐楚喪故光乘間而動稱國以弑罪在僚

楚殺其大夫卻宛

郤穀作却宛於宛反又於元反

左傳卻宛直而和國人說之鄢將師為右領

官名

與費

無極比而惡之令尹子常賄而信讒無極譖卻宛焉

謂子常曰子惡欲飲子酒

子惡卻宛

又謂子惡令尹欲飲

酒于子氏子惡曰我賤人也不足以辱令尹令尹將

必來辱為患已甚吾無以酬之若何

酬獻

報無極曰令

尹好甲兵子出之吾擇焉取五甲五兵曰寘諸門令

尹至必觀之而從以酬之及饗日惟諸門左無極謂

令尹曰吾幾禍子子惡將為子不利甲在門矣子必

無往且此役也

此春救
潛之役

吳可以得志子惡取賂焉而

還又誤羣帥使退其師曰乘亂不祥吳乘我喪我乘

其亂不亦可乎令尹使視卻氏則有甲焉不往召鄢

將師而告之將師退遂令攻卻氏且蕪之子惡聞之

遂自殺也國人弗蕪令曰不蕪卻氏與之同罪或取

一編管焉

編管
苦也

或取一秉

把

也

稟

焉國人投之遂弗

蕪也令尹炮之盡滅卻氏之族黨殺陽令終與其弟

定及佗

今終陽
勾子

與晉陳

楚大

及其子弟晉陳之族呼

于國曰鄔氏費氏自以為王專禍楚國弱寡王室蒙
王與令尹以自利也令尹盡信之矣國將如何令尹
病之

秋晉士鞅宋樂祁犁衛北宮喜曹人邾人滕人會于扈
左傳秋會于扈令戍周且謀納公也宋衛皆利納公

固請之范獻子取貨于季孫謂司城子梁

宋樂祁也

與北

宮貞子

衛北宮喜

曰季孫未知其罪而君伐之請囚請亡

于是乎不獲君又弗克而自出也夫豈無備而能出

君乎季氏之復天救之也休公徒之怒而啟叔孫氏之心不然豈其伐人而說甲執冰以游叔孫氏懼禍之濫而自同於季氏天之道也魯君守齊三年而無成季氏甚得其民淮夷與之有十年之備有齊楚之援

公雖在齊言齊不致力

有天之贊有民之助有堅守之心有

列國之權而弗敢宣也事君如在國故鞅以為難二子皆圖國者也而欲納魯君鞅之願也請從二子以圖魯無成死之二子懼皆辭乃辭小國而以難復

胡傳文十五年諸侯盟于扈將為魯討齊齊侯賂之而不克討故在會諸侯略而不序今此謀納公亦以賂故不克納而諸國之大夫皆序何也曰利于納公者宋衛之大夫也受賂而不欲納公者獨范鞅主之耳又況戍周之令行乎所以列序而不畧也以此見聖人取舍之大情而輕重審矣 按淮夷與之有十年之備欲何為哉有列國之權而弗敢宣也事君如在國意如之姦深矣

冬十月曹伯午卒

邾快來奔

徐邈曰自此以前邾畀我庶其並來奔今邾快又至
三叛人俱以魯為主邾魯隣國而聚其逋逃為過之
甚故悉書之以示譏也小國無大夫故但舉名而畧
其氏 家氏曰庶其畀我來奔季孫宿始納之今邾
快又來奔意如復納之宿意如世濟其凶不君其君
又誘人之臣使之叛其君而已為之逋逃主罪可勝

誅乎快郟之賤者不足錄也而春秋錄之誅季氏之
無君也三十一年黑肱以濫來復受之而不疑推其
無忌憚之心亦何所不至春秋詳之非誅叛人實誅
季氏也

附左傳孟懿子陽虎伐鄆

陽虎季氏家臣伐鄆欲奪公鄆使公不得居也鄆

人將戰子家子曰天命不惱久矣

惱疑也言棄居不疑

使君亡

者必此衆也天既禍之而自福也不亦難乎猶有鬼
神此必敗也嗚呼為無望也夫其死於此乎公使子

家子如晉公徒敗于且知

近鄆地

楚卻宛之難國

言未已進胙者

國中祭祀也

莫不謗

詛也

令尹沈尹戍言于子

常曰夫左尹與中廢尹莫知其罪而子殺之以興謗

讟至于今不已

左尹卻宛也中廢尹陽令終

戍也惑之仁者殺人

以掩謗猶弗為也今吾子殺人以興謗而弗圖不亦

異乎夫無極楚之讒人也民莫不知去朝吳出蔡侯

朱喪太子建殺連尹奢屏王之耳目使不聰明不然

平王之溫惠共儉有過成莊無不及焉所以不獲諸

侯邇無極也今又殺三不辜以興大謗

三不辜卻氏陽氏晉陳氏

幾及子矣子而不圖將焉用之夫鄆將師矯子之命

以滅三族國之良也而不愆位吳新有君

光新立疆場

日駭楚國若有大事子其危哉知者除讒以自安也

今子愛讒以自危也甚矣其惑也子常曰是瓦之罪

敢不良圖九月己未子常殺費無極與鄆將師盡滅

其族以說于國謗言乃止

公如齊

左傳齊侯請饗之子家子曰朝夕立於其朝又何饗

焉其飲酒也乃飲酒使宰獻而請安

比公于大夫也禮君不敵臣晏

大夫使宰為主獻獻爵也請安齊侯請自安不在坐也

子仲

魯公子懿子

之子

曰重為齊侯夫人曰請使重見子家子乃以君出

公至自齊居于鄆

附左傳十二月晉籍秦

籍談子

致諸侯之戍于周魯人

辭以難

二十有八年春王三月葬曹悼公

公如晉次于乾侯

左傳春公如晉將如乾侯子家子曰有求于人而即

其安人孰矜之其造于竟弗聽使請逆于晉晉人曰

天禍魯國君淹恤在外君亦不使一个辱在寡人而

即安於甥舅其亦使逆君

言自使
齊逆君

使公復于竟而後

逆之杜氏曰乾侯在魏郡斥丘縣晉竟內邑

夏四月丙戌鄭伯寧卒

寧公
作甯

六月葬鄭定公

秋七月癸巳滕子寧卒

寧公作甯

冬葬滕悼公

二十有九年春公至自乾侯居于鄆齊侯使高張來唁

公

左傳春公至自乾侯處于鄆齊侯使高張來唁公稱

主君

比公于大夫

子家子曰齊卑君矣君祇辱焉公如乾

侯杜氏曰唁公至晉不見受

公如晉次于乾侯

左傳平子每歲賈

賈也

馬具從者之衣履而歸之于乾

侯公執歸馬者賣之乃不歸馬衛侯來獻其乘馬曰

啟服

馬名

塹而死公將為之櫝子家子曰從者病矣請

以食之乃以幃裹之公賜公衍羔裘使獻龍輔

玉名

于

齊侯遂入羔裘齊侯喜與之陽穀

齊邑

公衍公為之生

也其母偕出

之產舍

公衍先生公為之母曰相與偕出

請相與偕告三日公為生其母先以告公為為兄公

私喜于陽穀而思於魯曰務人

公為

為此禍也

始與公

若謀遂

季氏且後生而為兄其誣也久矣乃黜之而以公衍為太子

夏四月庚子叔詣卒

穀梁傳季孫意如曰叔俛無病而死此皆無公也是天命也非我罪也

秋七月

冬十月鄆潰

孔氏曰公自二十六年以來常居于鄆此時公既如

晉必留人守鄆鄆人潰散而叛公使公不得更來當是季氏道之使然

三十年春王正月公在乾侯

范太史淳夫論唐事而及此曰季氏出其君魯無君者八年春秋每歲必書公之所在不與季氏之專國也唐史列武后于本紀不沒其實以著其惡竊以為不然中宗之有天下受之于高宗天下者唐之天下也武氏安得而間之復繫嗣聖之年黜武氏之號竊

取春秋之義雖獲罪于君子而不辭也 劉氏曰左氏云不先書鄆與乾侯非公且微過也非也向者公雖去國然猶居鄆古人所謂若在竟內則猶君也是以不歲首書鄆耳去年公如晉次于乾侯但是暫時次止之名猶以鄆為居自然不得書公在乾侯也今鄆人潰散公無所入羈旅他國國非其有故書公在以繫一國之事是聖人至意深淺各有所出豈但微過哉公雖有過不若季氏之悖也其寧縱釋季氏專

攻公身而已

夏六月庚辰晉侯去疾卒秋八月葬晉頃公

頃音頤

左傳夏六月晉頃公卒秋八月葬鄭游吉弔且送葬

魏獻子使士景伯詰之曰悼公之喪子西弔子蟜送

葬今吾子無貳何故

弔葬共使

對曰諸侯所以歸晉君禮

也禮也者小事大大字小之謂事大在共其時命字

小在恤其所無以敝邑居大國之間共其職貢與其

備禦不虞之患豈忘共命

言不取忘共命以所備禦者多不及辨之

先王

之制諸侯之喪士弔大夫送葬唯嘉好聘享三軍之事于是乎使卿晉之喪事敝邑之間先君有所助執紼輓索矣若其不間雖士大夫有所不獲數矣大國之

惠亦慶其加而不計其乏明底其情取備而已以為禮也靈王之喪我先君簡公在楚我先大夫印段實往敝邑之少卿也王吏不討恤所無也今大夫曰女盍從舊舊有豐有省不知所從從其豐則寡君幼弱是以不共從其省則吉在此矣唯大夫圖之晉人不

能詰

冬十有二月吳滅徐徐子章羽奔楚

羽公作禹

左傳吳子使徐人執掩餘使鍾吾人執燭庸

二十七年奔故

二公子奔楚楚子大封而定其徙

大封與土田定其所徙之居

使

監馬尹大心逆吳公子使居養

二子奔楚楚逆之于竟也養即所封之邑

莠尹然左司馬沈尹戌城之

城養

取于城父與胡田

胡子

之地以與之將以害吳也子西諫曰吳光新得國而親

其民視民如子辛苦同之將用之也若好吳邊疆使

柔服焉猶懼其至吾又疆其讎以重怒之無乃不可乎吳周之胄裔也而棄在海濱不與姬通今而始大比于諸華光又甚文將自同于先王

先王謂太王王季亦自西戎始

不知天將以為虐乎使翦喪吳國而封大異姓乎其抑亦將卒以祚吳乎其終不遠矣我盍姑億吾鬼神而寧吾族姓以待其歸將焉用自播揚焉王弗聽吳子怒冬十二月吳子執鍾吾子遂伐徐防山以水之

防壅山水以灌徐

已卯滅徐徐子章羽斷其髮

自刑示懼

攜其夫

人以逆吳子吳子喑而送之使其邇臣從之遂奔楚楚

沈尹戌帥師救徐弗及遂城夷使徐子處之

夷城父也吳

子問于伍員曰初而言伐楚余知其可也而恐其使

余往也又惡人之有余之功也今余將自有之矣伐

楚何如對曰楚執政衆而乖莫適任患若為三師

以肄

勞也

焉一師至彼必皆出彼出則歸彼歸則出楚必

道敝亟肄以罷之多方以誤之既罷而後以三軍繼

之必大克之闔廬從之楚于是乎始病 啖氏曰徐

子名者初已服吳子唁而送之非能自奔也 常山
劉氏曰齊滅譚楚滅弦狄滅溫君奔皆不名者強暴
加于小弱力不能勝而奔義未絕也訴于天子方伯
則理可申而國可復豈可遽絕之哉章羽既已服吳
而後奔楚則既降矣安有興復之志哉故名之以著
其絕也

三十有一年春王正月公在乾侯

左傳言不能內外也 杜氏曰公內不容於臣子外不

容於齊晉所以久在乾侯

季孫意如會晉荀躒於適歷

杜氏曰季氏出其君而納邾快黑肱卒大夫會葬
晉宋滕薛晏然如二君矣君在外雖卿有事不書
必有諸侯之事而後書故文公在晉教會垂隴襄
公在晉宿會邢丘皆伯令也昭公在乾侯意如會
適歷非諸侯之事也則何以書以晉之釋君而助
臣也士鞅會諸侯之大夫于扈將以納公取貨于

季而遂不果荀躒復為此會昭公所以死於外也襄
昭之際大夫無君之禍晉人爲之也

夏四月丁巳薛伯穀卒

晉侯使荀躒唁公于乾侯

左傳夏四月季孫從知伯

荀躒

如乾侯子家子曰君與

之歸一慙之不忍而終身慚乎公曰諾衆曰在一言
矣君必逐之荀躒以晉侯之命唁公且曰寡君使躒
以君命討於意如意如不敢逃死君其入也公曰君

惠顧先君之好施及亾人將使歸冀除宗祧以事君

則不能見夫人

謂季孫也

已所能見夫人者有如河荀躒

掩耳而走曰寡君其罪之恐敢與知魯國之難

言恐獲不

納君之罪今納而不入何敢復知耶

臣請復于寡君退而謂季孫君怒

未怠子姑歸祭子家子曰君以一乘入于魯師季孫

必與君歸公欲從之衆從者脅公不得歸

附左傳秋吳人侵楚伐夷侵潛六

皆楚邑

楚沈尹戌帥

師救潛吳師還楚師遷潛于南岡而還吳師圍弦左

司馬戍右司馬稽帥師救弦及豫章吳師還始用子胥之謀也

冬黑肱以濫來奔

肱公作弓

左傳冬邾黑肱以濫來奔賤而書名重地故也君子曰名之不可不慎也如是夫有所

有地也

有名而不如

其已以地叛雖賤必書地以名其人終為不義弗可滅已是故君子動則思禮行則思義不為利回不為

義疚

見義即為之

或求名而不得或欲蓋而名章懲不義

也齊豹為衛司寇守嗣大夫作而不義其書為盜邾

庶其莒牟夷邾黑肱以土地出求食而不求其名

賤而必書

春秋叛者多唯取三人來適魯者三人皆小國大夫故曰賤

此二物者

所以懲肆而去貪也

物事也齊豹書盜懲肆也三叛人名去貪也

若艱難

其身以險危大人而有名章徹攻難之士將奔走之

若竊邑叛君以微大利而無名貪冒之民將寘力焉

是以春秋書齊豹曰盜三叛人名以懲不義也 社

氏曰黑肱邾大夫濫東海昌慮縣不書邾史闕文

唐陳氏曰不曰邾史闕文二傳不言其闕互相穿鑿
汪氏曰習于公穀而不得其義者或以為通濫為
國或以為別乎邾皆妄說也齊楚大國且未嘗分其
地以封子弟況蕞爾之邾乎苟別于邾而自為國又
何為挾地以歸他國乎

十有二月辛亥朔日有食之

三十有二年春王正月公在乾侯

取闕

杜氏曰闕魯地在東平須昌縣東南公居乾侯遣人
誘闕而取之 張氏曰昭公之難叔孫如闕定公元
年將葬昭公季孫使役如闕公氏將溝焉此魯地而
公取之也 蜀杜氏曰志公在外而得邑於季氏雖
復得之如取諸外也 杜氏曰公羊云不繫邾婁諱
亟也凡春秋書取地而不繫國公羊皆以為邾邑而
諱亟抑何謬耶

夏吳伐越

左傳始用師于越也史墨曰不及四十年越其有吳

乎

存亡之數不過三紀歲星三十歲故曰不及四十年

越得歲而吳伐之

必受其凶

此年歲在星紀星紀吳越之分也歲星所在其國有福吳先用兵故受其凶

秋七月冬仲孫何忌會晉韓不信齊高張宋仲幾衛

世叔申鄭國參曹人莒人薛人杞人小邾人城成周

世叔

穀作太叔莒人下公有邾婁人穀有邾人

左傳秋八月王使富辛與石張如晉請城成周

子朝之亂

其餘黨多在王城敬王畏之徙都成周成周狹小故請城之

天子曰天降禍于周

俾我兄弟並有亂心以為伯父憂我一二親昵甥舅
不遑啟處於今年勤戍五年余一人無日忘之閔
閔焉如農夫之望歲懼以待時伯父若肆大惠復二
文之業弛周室之憂徵文武之福以固盟主宣昭令
名則余一人有大願矣昔成王合諸侯城成周以為
東都崇文德焉今我欲徵福假靈於成王修成周之
城俾戍人無勤諸侯用寧螫賊遠屏晉之力也其委
諸伯父使伯父實重圖之俾我一人無徵怨于百姓

而伯父有榮施先王庸之范獻子謂魏獻子曰與其
戍周不如城之天子實云雖有後事晉勿與知可也
從王命以紓諸侯晉國無憂是之不務而又焉從事

魏獻子曰善使伯音

韓不信

對曰天子有命敢不奉承

以奔告于諸侯遲速衰序於是焉在冬十一月晉魏

舒韓不信如京師合諸侯之大夫于狄泉尋盟

尋平丘盟

且令城成周己丑士彌牟營成周計丈數揣高卑度

厚薄仞溝洫

度高曰揣
度深曰仞

物土方議遠邇

物相宜也相
土之方面遠

近之量事期

知事幾時畢

計徒庸

知用幾人功

慮財用

知費幾財用

書餼糧

知用幾糧食

以令役于諸侯屬役賦丈

付所當城大尺書

以授帥

帥諸侯之大夫

而效諸劉子韓簡子臨之以為成命

穀梁傳天子微諸侯不享覲天子之在者惟祭與

號故諸侯之大夫相帥以城之此變之正也

十有二月己未公薨于乾侯

左傳十二月公疾徧賜大夫

從公者

大夫不受賜子家

子雙琥

玉器

一環一璧輕服

細好之服

受之大夫皆受其賜

已未公薨子家子反賜于府人曰吾不敢逆君命也
大夫皆反其賜書曰公薨于乾侯言失其所也趙簡
子問于史墨曰季氏出其君而民服焉諸侯與之君
死于外而莫之或罪也對曰物生有兩有三有五有
陪貳故天有三辰有地有五行有體有左右有各有
妃耦陪貳王有公諸侯有卿皆有貳也天生季氏以貳
魯侯為日久矣民之服焉不亦宜乎魯君世從其失
季氏世修其勤民忘君矣雖死于外其誰矜之社稷

無常奉君臣無常位自古以然故詩曰高岸為谷深

谷為陵

雅小

三后之姓于今為庶主所知也昔成季友

桓之季也文姜之愛子也始震而卜卜人謁之曰生
有嘉聞其名曰友為公室輔及生如卜人之言有文
在其手曰友遂以名之既而有大功于魯受費以為
上卿至于文子武子世增其業不廢舊績魯文公薨
而東門遂殺嫡立庶魯君于是乎失國政在季氏于
此君也四公矣民不知君何以得國是以為君慎器

車與名爵

號

不可以假人 胡氏一桂曰昭公乾侯之

事人道非常之大變也史墨乃妄引陪貳之說而謂
夫生季氏以貳魯侯夫天使季氏貳君何嘗使季氏
逐君哉如墨言一歸之天道則亂臣賊子接跡于世
矣其與春秋書公薨乾侯如青天白日昭昭乎不可
欺蔽以誅季氏不臣之罪者豈不大戾哉

春秋輯傳卷十一